



誄章

康熙八年歲次巳酉孟秋壬辰朔越三日甲午 予  
告光祿大夫太傅兼太子太師吏部尚書中和殿內  
秘書院大學士加一級通家碁治生金之俊率男舉  
人金世濂護衛金世漢孫官生金秉樸候選五品京  
職金祖彭金秉掄生員金績金相戊官生金祖庚金  
祖誠謹以瓣香束帛致祭於

皇清光祿大夫總督浙江福建等處地方軍務兼理糧  
餉太子少保兵部尚書兼都察院右副都御史加一

級君翁趙老祖臺老先生之靈曰嗚呼皇天胡不仁  
兮奪閩浙之福星億兆喪其幃覆兮邦國失其干城  
驚凶問之倏來兮心恟怛而目瞪縱百身將焉贖兮  
彌追溯乎生平翳三韓之世胄兮連五緯而儲精應  
昌期以誕降兮爲一代之鉅人夙厲志於墳典兮快  
筆陣之縱橫洵雕龍與繡虎兮遂觀光而用賓爰起  
家於花縣兮試出匣之青萍迨鳴琴之奏最兮飛鳧  
鳥而逡巡分郡符以共理兮普吳會之陽春正雲雷  
之初造兮如蝸蟻而沸羹非循良之噢咻兮孰持危

而定傾留去思於甘棠兮仰芟舍之清塵才名奕其  
彪炳兮盤錯於焉游更南服時猶梗化兮煩上相之  
經營當星沙之轉戰兮實重慮夫呼庚藉長才以叱  
馭兮俾輸輓之時羸汔全楚之蕩定兮滇黔取次而  
廓清維瘡痍之乍息兮恐伏莽之潛萌九重深其  
南顧兮憑壯猷以支撐羗建牙而開闢兮奠初闢之  
郊垵一車書於焚爨兮令反側之不生越昆池與洱  
海兮距木案而龍坑咸歸琛於天府兮日來享而來  
庭南人自此不復反兮三錫無忝於恩榮睠海氛之

未靖兮資元老之威靈用立馬於吳山兮溯胥濤而  
揚舲墨吏望風而解綬兮壁壘旌旗之一新七萃罔  
敢或譁兮四海安於閉閣 楓宸隆其眷注兮乃兼  
總乎八閩試騁望於越王之臺兮知協氣之晶熒高  
策勲於盟府兮宜金甌之貯名行人叅夫密勿兮副  
想望於羣氓嗟機務之殷繁兮固憂勞之宿并適海  
溘之橫流兮如饑溺之在身親巡省而勞來兮廢寢  
興而不寧旣鞅掌以盡瘁兮遽乘箕而上征 當宁  
爲之撤懸兮國人巷哭而失聲昔暫假而襄事兮萬  
姓奔趨而遮行矧茲陟降於帝傍兮將何以慰此輿  
情惟俊越在明農兮爲國惜其棟楹况桑梓之失蔭  
兮念誰嗣而怍怍攬茹蕙以掩涕兮媿炙絮之遙申  
諒英爽之非遐兮鑒歌些之微誠哀哉尚饗

康熙十年歲次辛亥十二月戊寅朔越祭日癸未光祿大夫太子太保兵部尚書加一級前戶刑二部尚書今致仕舊治眷弟王弘祚率男候選正六品京秩廕生瑜候選從五品京秩廕生瑄姪見任山西澤州知州璋謹以剛鬣柔毛清饜庶品之儀致祭於皇清光祿大夫總督浙江福建太子少保兵部尚書兼都察院右副都御史諡清獻君翁趙老公祖之靈曰於惟我公得厚於天篤生名世洵五百年懸弧之日雲擁星躔文經武緯上應固然幼好讀書恒寡言笑

過目數行擗管闡奧言皆名詮性本忠孝許謨讜論  
有裨廊廟筮仕山陽寇猶猖獗勦撫互施卒彰偉烈  
佐郡江寧鯨鯢遁絕奉檄豫章招致餘孽全活生靈  
以數萬計代庖道府聊展經濟吏畏神明民歌慈惠  
緩徵恤艱遂致違例公乃歸田菽水養母經畧起公  
公顧不可母力趣之身非母有絕裾始行監軍楚藪  
洎遷湖南長沙僉憲調濟多方機權應變事事修舉  
轟雷掣電洞庭金湯峙如鼎奠卓異方舉太母訃至  
公絕復甦甦絕數四抱恨奔喪是公素志援引旗例

在任守制載擢糧儲綱維丕振三楚得公無亂不定  
墾荒爲壤軍民司命 特簡黔撫豈異人任總制升  
庸滇黔并攝竊據之餘慘不忍說天佑遐荒仗公秉  
鉞渠魁就俘大張撻伐捷聞增秩司馬崇銜招來開  
墾瘠土成田用晉宮保中外歡傳民生國計端賴仔  
肩滇黔自昔民力難支寇逆蹂躪十載於茲凋殘景  
象見者心摧藉公再造保有子遺遐烽旣熄越檄猶  
殷提衡兩浙 吳命新承向化必宥負固就擒安內  
攘外畢殫苦心 心血旣枯鞠躬盡瘁再三陳情太母

未痊請假襄事永言錫類馬鬣就封

溫綸勉慰浙

閩控制重寄復膺軍旅倥偬介馬馳行山川要害目  
擊心營繪圖以進地盡陽春巡行海徼疾次馬輿一  
夕仙遊鸞音浩浩遠邇傳聞鼓樂前導詎騎箕尾上  
昇蒼昊孩童女子踰地呼翁深山窮谷罷市輟春士  
民赴奠涕泣如崩方之古人司馬溫公祚遑任司農  
讀諸條疏六事八款折心敬服昌言於朝宣公再錄  
古社稷臣推心置腹公訃上聞 天子興嗟亟與謚  
廕徽音寵嘉 賜祭三壇 卹典有加身後異數朝

野咸誇昔宋清獻夔龍接武琴鶴相隨清徹海宇焚  
香告天不自欺侮公之冰操真乃繩祖矧兩令器玉  
樹翩翩二難濟美無忝名賢洵登華廡奕世蟬聯德  
厚報豐含笑九原祚叨舊治夙荷悁懔瞻懷明德恫  
切五衷薄言采訖以展菲葑靈其昭鑒歆格攸同嗚  
呼哀哉尚饗





子少保兵部尚書兼都察院右副都御史加一級君  
翁趙老祖臺之靈曰王者承乾名世開先草昧之候  
兆庶籲天天之荅之公挺生焉鼎革之後

聖主求賢公之荅之節鉞褒然入擅三長出試百艱隨  
握大斗與天周旋福曜一方雲雷九埏遜序成歸閱  
有八年公之生存動足千古歿而明神詩以亡補聊  
述公功以侑簋簠公功若何式歌且舞滿漢兼資兵  
民互居懽迎控竹化始褰帷四民失職其寒慄斯公  
執大杼衣之被之豈惟苦寒亦得調饑公爲大濤是

舖是糜民霖遜兵兵無遜師我慈我嚴儒而將之山  
魑陸梁以衽以席而彗不芒海水羣飛以輯以撫而  
波不揚江湖襟帶城社金湯墨吏風解赤單雲翔塗  
盈襁負圉化福堂是以二豎作祟而至萬姓拈香不  
啻衆父之父寧非全昌者昌嗚呼痛哉兩浙建牙八  
閩斧繡竺蜂攀轅幔亭設豆天下歎焉未筦樞首令  
公維新鄴侯如舊峩峩兩部若若兩綬天下歎焉未  
登朝右春秋鼎盛行年非殀其惜公者百歲猶少蘭  
蓀繞前胤祚非眇其祝公者三事猶小儲胥江海屹

然崩矣梁棟社稷若然傾矣赤幟正論漢壘平矣衮  
衣繼誦周道砥矣有肴崇俎有酒清矣衆口序公公  
如生矣尚饗

康熙八年歲次己酉二月甲子朔越廿九日壬辰太  
子少保禮部右侍郎文淵閣學士胡拱樞禮科都給  
事中姜天樞內秘書院編修加一級李宗內陞京堂  
兵科都給事中金漢鼎內陞京堂禮科都給事中姜  
希轍內陞京堂工科給事中周明新原任江南道監  
察御史王士驥江南分守江鎮兵備道布政使司右  
叅政胡昇猷禮部儀制清吏司員外郎俞有章謹以  
剛鬣柔毛庶羞清酌之奠致祭於

皇清光祿大夫總督浙閩等處地方軍務兼理糧餉太

子少保兵部尚書兼都察院右副都御史加一級君  
翁趙老祖臺之靈曰嗚呼豐功茂德之人不經見於  
當世幸而間出天固篤生之以翼亮邦家綏懷氓庶  
而嚮用方殷中道摧折是朝端爲之震悼有識爲  
之傷心者也公起家循吏歷試多艱自州郡而監司  
而卿貳而公孤無日不治兵牧民者自秦隴而江南  
而荆楚而滇黔而浙閩無日不治兵而兵治牧民而  
民牧者竊計開國以還所稱功懸日月勲勒河山  
名公巨卿亦綦衆矣至於所至輒有仁聲使人敬之

如神明戴之如父母則與公比肩者何可多得乎哉  
卽以在浙言之問共事諸大僚何以同寅協恭無猜  
無貳視公之心以爲心問大小諸有司何以改絃易  
轍大法小廉視公之令以爲令問卿士大夫何以私  
言無敢干公言無不採有古建鞮納誨之美問將校  
卒伍何以入市肆不敢二價行野不敢樵蘇有古司  
馬束伍之法問山藪海澨何以鳴吠不復驚羽書不  
復告有古銷兵偃革之漸問府史胥徒何以舞文之  
智日窮侵牟之巧日挫有古蒲鞭撻吏之風問境內

四民何以望車塵則以手加額聞令下則拭涕而歌  
有古甘棠勿剪之愛公蓋本忠厚之心弘寬平之量  
虛以持已恕以待物周于慮事廣于聽言有不易燭  
之民隱惟公能徧燭之有不堪受之物情亦惟公能  
曲受之舉古今來幹濟大臣俾權譎詐之術驕矜  
凌厲之氣堅僻膠固之情澄汰無餘而一歸之以至  
誠雖學道數十年恐未易望公之涯涘也是以策勲  
府者人各有其業而公之業則爲大業銘太常者人  
各有其名而公之名則爲顯名方其從橐鞬以底定

筇龐膺 簡命而總制浙閩 朝廷紆東顧之憂億

兆慰其蘇之望當此水火初罹瘡痍未起天假公以  
數年區畫休養生息坐致雍變無難矣何一旦奪之  
速也 樞等在岍嶮之下父兄子弟食德惠于無窮念

公功滿天下而終公之功德者乃在東南念公勞瘁  
徧東南而終公之勞瘁者乃在我越是則天下之人  
皆慟公而我越人之慟公爲尤甚也 樞等又將何以

爲情耶峴山有望碑之淚豫州有哭巷之聲千秋尸  
祝自今伊始區區蘋藻之薦詎足以邀公盼享哉哀

哉尚饗

康熙八年歲次己酉孟夏月己巳朔越祭日庚辰巡撫江西等處地方工部尚書兼都察院右副都御史加至正一品又加二級眷弟董衛國頓首拜謹以剛鬣柔毛庶饑香帛之儀致祭於

大誥封光祿大夫總督浙閩等處地方提督軍務兼理糧餉太子少保兵部尚書兼都察院右副都御史加二級君翁趙老先生大人之靈前而言曰全浙居東南之大半而錢塘古帝王都又居浙東西之大半畫江以東則有四明會稽以迄括蒼皆聯山瀕海號

爲難治江以西則吳興樛李財賦充繁又益之以八  
閩易叛難靖之地總督大中丞皆得控禦而救寧之  
非爽邦之哲如李文饒之撫治西川韓魏公之經畧  
涇源不可今 天子屢有東南顧盼以趙公負天下  
重望舉浙閩十九郡全聽治於我公知人哉然而浙  
之民曰我衮衣也爾閩曷有焉閩之民又曰我新衮  
衣也爾浙豈能私之相爭不置如此所以然者公以  
懷柔來遠以挾纊予軍以豈弟字民宜蒼頭白首暨  
兜鍪之卒無不生則歌以祝死則思而哭哭而擗踊

以哀之也稽昔召公聽訟於樹下後人指甘棠而念  
其美且憩一剪拜之弗忍周公之告君奭曰天壽平  
格又曰耆造德不降吾則鳴鳥弗聞公筮仕郡僚受  
知經畧詰邦政於六師統旬宣於兩省德化之被浙  
也深且久十六以下公所長六十以上公所養山陬  
海澨之沾化者搖尾乞憐前後招徠安集之不啻數  
萬計方之召公分陝政治殆有過焉自宜令聞長世  
蕃祉老壽爲 朝廷侷人奠柱石於不朽奈何耆造  
不降鳴鳥無聞僅得欵獻雪涕指其憩美之樹而呼

號不逮也弟撫治江右密邇浙西凡公風聲所樹漸  
被吾豫十餘郡私淑而楷模之匪伊朝夕嗚呼今已  
矣監守臨安三山各郡以及文武百司執事繼自今  
立政立事奚所諮而奉焉士大夫之里居者與夫瞽  
宗上庠之教育奚所瞻仰部屋之啼飢顛寒以及流  
離瓌尾之衆于何檐粥而安堵焉輶軒所至考德問  
業爲太史採風者無所傳聞宜其思而哭哭而擗踊  
以哀之也聞訃之日市絕營販春不相歌溪山窮巷  
奔走悲號者載路如司馬溫公之繪像以祀一時楮

貴洛陽矣嗚呼公生也無由一覲龍光公亡也不能  
酌觴執紼然功德在人間旂常炳炳以勞定國以死  
勤事載在祀典浙閩咸奉蒸嘗永妥以佑公靈爽在  
天堂構在 以人其歌且祝如一日也生芻一束專一  
介而代陳遙望几筵鑒茲尚饗

康熙九年歲次庚戌九月乙卯朔越祭日壬午總督  
兩廣等處地方軍務兼理糧餉兵部尚書兼都察院  
右副都御史制眷弟周有德謹以剛鬣柔毛之儀致  
祭於

皇清君翁趙老親臺老先生之靈曰嗚呼公之盛德大  
業簡在 帝心播在天壤銘諸太常垂諸史冊何待  
余誅詞揚扆哉余所歎歎感嘆不能自己者則以神  
交于公者有年而竟不獲一握手之爲恨也憶自癸  
巳之歲余從 王師入荆楚維時公分節湖南每從



羽書中往來勞苦如平生歡公之譽望赫然在心目  
間而以凱旋還 朝晤言未遑也洎乎夜郎來王昆  
明底定公秉南天之鉞樹無前之勲余隨中朝士大  
夫之後逃聽風聲頌颺不暇及公 特簡兩越余亦  
濫竽三齊南北郵筒音問不絕高山景行奉爲模楷  
曾讀公陳情之表爲之慨然太息當我世而求忠孝  
兩全者舍公其誰前歲量移嶺表道出江上公敦遣  
信使遠貽尺素招以湖山之勝申以縞紵之雅自愧  
征塵冉冉不能在道亦謂從此歲月方永鞭弭有期

也余甫入嶺南卽以海疆之役驅馳旁午中道痛聞  
先君之訃神理荼酷幾不欲生乃苦塊之中忽聞公  
以盡瘁 王事騎箕海上矣且驚且悲徬徨累日嗚  
呼人之云亡邦國殄瘁天不憖遺典型安仰哉余旣  
罹大棘三疏陳情始幸得請歸次石城登公之堂俯  
仰几筵想像音容不知涕之何從也見公詰嗣魁奇  
磊落鴻軒鳳跂又歎公其不亡矣精靈在上炳爲列  
星克昌厥後詒諸燕翼以公之盛德大業存歿何殊  
去留靡憾獨是余今日低徊而不能去也惟始終付

之神交而已矣嗚呼哀哉尚饗

康熙八年歲次己酉季春甲午越祭日乙巳總理糧  
儲巡撫江寧等處地方工部尚書兼都察院右副都  
御史正一品眷弟韓世琦謹以剛鬣柔毛瓣香束帛  
清酌庶羞之儀致祭於

皇清光祿大夫總督浙江福建等處地方軍務兼理糧  
餉太子少保兵部尚書兼都察院右副都御史加一  
級君翁趙老親臺老先生之靈曰公以勤勞王事而  
歿也可以荅 兩朝特簡之恩公其一代人傑也哉  
公才畧明敏德量弘深早受知於經畧公荆蜀滇黔

之役經畧公以元臣專閫帥禁旅深入不毛此亦開  
國以來一大戰功也經畧公稔知公才畧以爲軍興  
百萬轉戰數千里轉輸大事非公不可任是以有奪  
情之舉公此時始得一展驥足矣由是登劍門越雲  
棧收貴竹渡天生舉雕題繡齒之民盡入版圖不數  
年而成曠世之功者經畧之運籌決勝賴有公之繕  
甲兵備舟車供糗糗無稍匱乏也方之蕭何關中寇  
恂河內何異焉公其人傑也哉洎經畧凱旋 朝廷  
以南方初定不得練達重臣不足以鎮撫百姓遂擢

公開府又進秩節鉞於是有 特簡之咨公爲之布  
威德招流移撫瘡痍之衆消反側之萌而此時公乃  
大展才猷矣然炎氛雖熄海波猶揚 天子以經畧  
旣老惟公才望足以繼之所以重有浙閩之命而公  
爲聯和文武調劑兵民綏來遠人無不開誠布公殫  
心畢慮以報効 朝廷於斯時也塞無傳烽亭無卧  
鼓易鱗介爲衣裳置要荒於衽席如公者信乎功在  
社稷澤被蒼生者矣第因海氛未能盡息 天子念  
巖疆重地加意綢繆特遣近臣同公巡省公單騎就

道徧行海隅拮据卒瘁自秋徂春日無寧晷王事甫  
畢馬羈未脫而公已捐館嗚呼公亦可謂鞠躬盡瘁  
死而後已者矣蓋公於君則忠於民則勤處已則約  
馭下則寬好賢樂善不憚舍已而從信賞必罰一惟  
平恕以施用一人天下不以爲私刑一人天下不敢  
有怨居一代之令名存古今之元氣朝野無疵議恩  
怨無間言惟公之謂與琦與公壤接輔車藉公屏蔽  
景公高山方慶 國家無東顧之憂而琦亦竊西鄰  
之庇訃音馳至余坐若失行若忘廢寢食者累日蒼

蒼者何不留公爲 聖主佐太平圖久安之治耶雖  
然公雖歿公之功與德則固垂竹帛震天壤耀星日  
終古而不可泯也公洵一代之人傑也哉遙酌清尊  
望風隕涕遠邇咸悲山河改色嗚呼哀哉尚饗

大清康熙八年歲次己酉三月甲午朔越十有八日巡

撫安徽寧池太廬鳳滁和廣等處地方工部尚書兼  
都察院右副都御史加二級眷弟張朝珍謹以牲帛  
庶饜之儀致祭於  
總督浙閩等處地方軍務兼理糧餉太子少保兵部  
尚書兼都察院右副都御史加一級君翁趙公之靈  
日嗚呼天欲平治天下必篤生豪傑上以應

聖天子之旁求下以副億萬姓之瞻仰故其生也不偶  
而沒也有傳又何足爲公痛哉乃有不能不痛而爲

天下惜者惟公稟河嶽之精英挺乾坤之秀氣特  
簡方召出臨閩浙朝廷賴爲藩屏億兆倚爲孔邇  
百辟恃爲儀型將士樂爲豫附譬如大川喬嶽其利  
澤之及於物者不可以數計而周知方期調和鼎鼐  
霖雨蒼生何徑翩然駕鶴遽歸瑤島耶思公之控制  
海邦也無利不興無害不除鯨鯢遁跡鷹眼潛消故  
公之沒也停春罷市懸像巷哭者遍乎吳山越水武  
夷九曲之境亦何能免百姓之謳思而望碑墮淚乎  
然公之上致下澤可以無憾矣獨是弟也久叨鄰照

長城是藉忽聞捐館如失所倚悵躬奠之未能惟潛  
焉以出涕薄陳祭筵聊申悃誠伏惟尊靈來格來歆  
尚饗

康熙歲次己酉二月二十有九日巡撫浙江等處地方都察院右副都御史加一級眷弟范承謨謹以清酌庶饒剛鬣柔毛之儀致祭於

皇清光祿大夫總督浙閩等處地方提督軍務兼理糧餉太子少保兵部尚書兼都察院右副都御史加一級君翁趙老親臺之靈曰嗚呼余與公何始終未及一面乎余童時卽聞海內有君鄰先生爲當代儀表迨筮仕以及今日垂二十年而未嘗一日通殷勤蓋徒爲神奉也去歲十二月冬余撫浙命下奉嚴檄

戒途於今春二月十一日抵省受事公正閱視海疆  
由閩而越於月之十六日抵寧之奉化境奉化距省  
不數程余方遣一介以候行李而公訃音至矣嗚呼  
余與公何始終未及一面乎余 陛辭時蒙

皇帝面諭諄切夙夜怵怵深以不克負荷爲憂復私計  
芳軌在前得以亦步亦趨而二十年來未面入夢之  
忱攄於一旦又竊用自慰不謂余履任之期卽去公  
乘箕之日不遠也寧不悲哉無惑乎擬修楚些之詞  
而筆輒搖搖不忍下蓋幾爲神稿也公歷任巖疆威

惠並著得公者如得豐年失公者如失慈父卒之日  
巷空聞走軍民奔號之聲徹晝夜禮臣修勞臣故實  
行且器錫後園公亦可云無憾况乎碑傳南詔淚墮  
峴山遺愛在民余亦何能更僕獨是浙當水陸衝衢  
登更水旱民苦於賦吏病於貪兵逞於驕俗刁於訟  
余方望公左提右携得借手以告 臨軒而營頭星  
殞哲人云亡此東南半壁之失其禔福也而余以與  
公未及一面爲於邑其尚屬小人之見乎公靈爽在  
天其鑒余言以啓余衷哀哉尚饗



康熙八年歲次己酉九月辛卯朔越祭日壬寅總督河道提督軍務太子少保兵部尚書兼都察院右副都御史正一品眷弟楊茂勳謹以剛鬣柔毛香帛庶饑之儀致祭於

皇清誥封光祿大夫總督浙閩軍務兼理糧餉太子少保兵部尚書都察院右副都御史加一級君鄰趙公之靈前而言曰嗚呼我公秉星嶽靈秀之氣應運而生由方面推轂節鉞而峻陟至乎三公其宦轍之所至自吳楚滇黔兩浙八閩與夫雕題鑿齒之國越裳

重譯之鄉無不梯山航海來販恐後而凜服乎威名  
其中之蘊藏羅二酉包四庫金版玉笈文經武緯直  
堪上馬擊賊下馬作露布而才華四溢如意縱橫其  
精神之所注 國爾忘家公爾忘私目十行下案無  
留牘而大綱獨挈細節復舉挺挺乎如松柏之巍生  
以是 朝廷之上冠帶之倫及乎黎首梵鑿下至兒  
童走卒而莫不知有司馬相公嗚呼我公論公之才  
論公之德論公之精神品貌宜膺上壽胡爲乎遽騎  
箕尾而爲列星我知之矣公朽者身而不朽者名蹇

蹇王臣鞠躬盡瘁歿後 恩綸寵被書之青史播之  
聲詩且與 國家億萬曆而無盡又奚有乎一時之  
瘁榮况鳳毛翩翩聯璧濟美行將繩祖武振家聲騰  
驥雲路後先爲 國之股肱弟茂勲托知最久辱愛  
獨深自分手黔南一晤白下而孰知不得再覩乎音  
容忽焉聞訃且信且疑似夢非夢而不禁涕泗之何  
從緣于役畚鍤莫克親馳乎几筵亦不敢襲泛泛之  
辭以冒溷夫九京惟藉此瓣香炙絮遙申九頓而矯  
首乎長虹嗚呼我公庶其鑒茲笑進一卮而逍遙乎



則所關於天下之治安者爲甚重以其人之存歿而  
生平企仰止于山高一旦失依歸于哲萎則所關於  
一人之景行者爲尤重余於公之逝也而深有感矣  
公生而岐嶷好學孝友性成待人接物溫如也明敏  
練達事無鉅細必親而冰操獨勵不特暮夜凜天人  
之鑒抑且公清動 聖主之知廉頑立懦世風賴挽  
維者大矣公其可逝乎公起家縣令歷官開府節鉞  
履任秦楚江南政績班班可紀唯黔滇初隸版圖哀  
鴻未集公撫之而肅吏誠民克襄底定公督之而籌

邊撫裸聿奏膚功其爲一方出湯火而登衽席者至  
今昆明貴竹間猶口碑籍籍不衰海波不寧

聖天子疇咨懷東顧憂移公督兩浙公至而巨帥投戈  
逋寇授首海澨歌清宴焉至其約束營屯清糧釐驛  
疏商恤囚諸善政蓋未易枚舉也兼督浙閩閱海界  
凡山川郡邑島嶼悉目營心識繪圖以獻

天子方恃爲浙閩長城藉舒 宵旰之厯而兩省民生  
咸食其德將永倚爲保障也公其可逝乎夫何以積  
年况瘁閱海馳驅而遂爾遽逝也耶余感公之逝也

而抑有思矣余之任淮揚也公任江寧余之任荆楚也公任星沙余之任滇黔也兩繼公以受事同舟也而公操其楫代瓜也而余續其貂宦遊相值如相訂然水乳之投于焉特契方期俟公建樹之餘瞻偉岸衣冠如洛下耆英聆朝夕誨也而何棄我遽逝耶余因思公之逝也而愈有感矣余與公甫別八年憶公顏色恍在目也憶公神情恍在懷也乃過公里而見素旄之歸也詢公疾而知積勞之致也詢公逝所而知在馬嶼之塘也離室家而不一訣視諸子而無一

言嗚呼我公鞠躬盡瘁何至如是以逝耶然而公之事業在青史功烈在旂常謳思在百姓

天子聞而震悼賜之葬賜之祭賜之謚復賜之廕公之逝也亦來矣哉人之死生有重於泰山者非公之謂乎而獨余之景行無從則又不禁其悲也已肅肅几筵憑棺欲絕靈其鑒之來格來歆尚饗

康熙八年歲次己酉仲春甲子朔越廿有七日庚寅  
鎮守浙江等處地方統領滿漢將軍加一級眷弟圖  
爾伯甚把都魯鎮守浙江等處地方統領滿漢將軍  
眷弟圖喇副都統加一級眷弟雅大理夏景梅陳典  
謨謹以剛鬣柔毛清酌庶饑之儀致奠於

皇清光祿大夫總制浙閩等處地方軍務兼理糧餉太  
子少保兵部尚書兼都察院右副都御史加一級君  
翁趙老先生之靈曰嗚呼維岱降靈實昇偉人何天  
不憖遽奪我公之速也蓋天爲社稷蒼生篤生我公

其深仁厚澤英猷茂績被于湘沅滇黔者不能殫述  
今茲膺命蒞浙也民未樂業者公則安集之兵未  
肅伍者公則嚴飭之以至弄兵潢池嘯聚山林者靡  
不望風歸附貪吏猾胥無所隱其奸且能化其奸凡  
諸善政數年來朝廷不煩東顧斯民得安衽席者  
皆公之功公天性至孝太夫人靈櫬久停公則屢疏  
墾葬卒得如願非忠孝兩全可以爲憲萬邦乎於是  
節制兩浙者兼制八閩公則曰浙民吾民福民亦吾  
民也拜命卽行閩中濱海巖疆諸務更劇于浙公

每興利剔害無不焦心勞思鞠躬盡瘁涉瘴癘冒寒  
暑積苦行間而甬東遂爲箕昇之所矣乃不知者以  
爲公惜不知公以社稷蒼生爲念苟有利於國有裨  
於民不靳身殉假令公不死行間家居易簣則身安  
而民不安公之目反不瞑矣是天以全節付公使得  
遂其志以視夫死於兒女之手者奚啻天壤哉訃聞  
之日兩浙人民無不哀號罷市直欲籲天無路甚等  
久叨教益締交雅好方期終始竭蹶共襄王事何天  
不憖遽奪我公之速也所可惜者國鮮人瑞邦失典

型泰山頽吾安仰哲人萎吾安倣崩心摧骨撫衷飲  
泣祇覺涕泗之無從矣薄庀椒觴聊罄積悽肅勒短  
章以志哀思耿耿予懷曷維其已嗚呼尚饗

康熙八年歲次巳酉六月辛未朔越祭日甲戌督理  
北新鈔關刑部四川清吏司掌印郎中伊桑阿吏部  
文選清吏司主事加一級汪以淳兵部武選清吏司  
他赤哈哈番加一級桑格督理杭關戶部福建清吏  
司員外郎加一級阿納庫吏部文選清吏司主事加  
二級史縉吏部文選清吏司他赤哈哈番阿山謹以  
剛鬣柔毛清酌庶饘之儀致祭於

皇清光祿大夫總督浙閩太子太保兵部尚書兼都察  
院右副都御史正一品加一級君翁趙老先生之靈



曰維靈嶽降蔚爲柱石淵畧夙函盛德純備剛大正  
直經天緯地秉鉞建旄長駕遠馭阿等風景清輝欽  
公勲績叨奉簡命滿擬指示詎意仙遊官民驚佈  
石人墮淚金仙悲泣惟公徽猷難以言悉心如月皎  
和同化日甫出視事朝野爲倚薄海內外依依喁  
喁駐節江寧老幼呼跡歷遷三楚反側俱服控制滇  
甸醜類悉驅揚名六詔長鯨首戮揮塵蕩平電掃雲  
霧帝念東南巖疆瘡痍浙閩絃誦光天樂育山魃  
潛消海波不熾折衝時建剛柔爲濟矢志心報國忠孝

格至寬和馭物愚智咸及趨蹌抒誠致來萬億遠至  
近懷莫不懽悽濱海上下悉賴安戢公獨賢勞三過  
不恤嚴霜楚雨晨暮巡歷念切寧民遑顧遐逝三台  
乍晦箕尾同宿蘭委香存劍埋斗窟川后頽波山靈  
太息朝應崇祀巷乃輟市所可喜者有子雙聯白  
壁笋立箕裘奕葉象賢繼起阿等遙聞訃音心愴如  
駛茲者薄具籟標清香數縷敬陳明薦用勒荒蕪涕  
涓沾巾情曷能已神其有靈鑒茲悃區五雲飄緲欣  
然來止尚饗

康熙八年歲次巳酉仲冬庚寅朔越祭日辛卯舊治  
眷弟眷晚生佟國器羅憲汶程正揆鄧旭黃國琦劉  
思敬郭亮方亨咸胥廷清胡士著丘越劉餘璉徐必  
遠蔡祖庚周而淳葉舟李文芳李臯陳世昌曾延孔  
鄧廷羅胡順忠范紹祖孟瑄王于玉黃志美王鉉吳  
樹聲劉玉珮梁胤麟沈豹周士先賈自強鄧源瀉危  
列宿胡禹冀謹以清酌香帛庶羞之儀致祭於

皇清誥封光祿大夫總督浙江福建等處地方軍務兼  
理糧餉太子少保兵部尚書兼都察院右副都御史

加一級謚清獻君翁趙老親翁老祖臺之靈日繫朔  
風之栗冽兮愁雲結而迷離木脫葉而含怨兮草經  
霜以變哀鳥烏號於窮谷兮獸不孛而參差北陸慘  
其閉塞兮物愴怳而若斯至人之誕降自天兮復乘  
化而騎箕靈輻歸於建業兮虎隊導以雲旗路掩涕  
而戶太息兮亦惟被崇蔭而卽事傷悲吁嗟乎當公  
之經營江上兮九鼎初定而民苦瘡痍撫摩與鞠育  
兮微仁者抑誰期澤旣深而我去兮三楚徼其羽儀  
斯時也長沙駐牧而振旅兮將飲馬於滇池芻粟需

以億萬兮俾宿飽而無飢丞相資公以輪輓兮水陸  
督而咸宜功旣記于幕府兮實命世之才奇 帝嘉  
予而賁寵兮遂建牙以撫群黎羅施畏威而懷德兮  
六詔稽首而逆我 王師銅標立兮夜郎西笮橋渡  
兮瀘水湄總西南之三軍兮節制乎兩陞 璽書復  
寄以閩越兮虎符龍節遠而來移爾乃餘諸之士宇  
肅清兮日出之群鳥就縻會稽無後至之防風兮西  
泠復笙歌之綺麗月涵波而無滓兮天澄碧而朝曦  
何爲乎五丈之風高兮倏三台之夜墮 天子失其

股肱兮 命史哀以來詞望泉臺而 諭祭兮數  
賜以六壘倣古而易以嘉名兮象功德而獲榮施彼  
曹武惠之好生兮累世貴顯而維祺公有孝子兮孝  
子不匱而孫岐疑躡踊哀號兮窆窀曾無後時卜石  
城之南岡兮馬鬣封其幽居器等向欽良牧之循政  
兮復景元勲之巨規方巽汾陽之二十四考兮亦願  
文潞公之九十英耆柱石兮遽折難持披總帷以奠  
椒觴兮靈爽鑒格茲公馮棺而一慟兮效執紼于九  
達音容永隔于今日兮麟閣萬禩而昭垂尚饗

康熙八年歲次己酉孟夏癸亥朔越十有四日督理  
江寧織造內工部加一級眷弟曹璽聞

皇清誥封光祿大夫總督浙江福建等處地方軍務兼  
理糧餉太子少保兵部尚書兼都察院右副都御史  
加一級君鄰趙公之訃謹遣清酌時羞奠於柩前東  
望拜哭而言曰嗚呼哀哉天何付公以瓌奇俊偉之  
材而不并假以耄耄期頤之壽何位公以總督屏藩  
之重而不遂畀以彌綸輔相之權使公明若履尊榮  
而無欲實則抱憂嘆以終天此中外志義之士所以

聞公之薨皆失聲而相弔或雖遐遠未識公面而亦不知其涕泗之流連者也嗚呼哀哉惟公生有異質秉性靈明澹泊守已坦懷接人讀書懷古返樸維令撝謙自抑世莫與京天亶至孝昏定晨省臨喪泣血慟徹蒼旻篤生友愛妻被共寢連枝早折痛欲隨殞竭事慈幃願報春暉筮仕山陽城郭受圍親率義勇殄滅言歸餘孽尚熾盤踞縣邑我公開誠單騎諭賊羅拜受撫遐邇懌悅璧畫樞機民賴以戢歷任江南善政莫數愛切黔黎周知疾苦韜畧機深有懷悉吐

贊謀幃幄湖南安堵我公克孝孺慕思歸忽焉訃至五內崩摧悲號陳情時與願違胼胝楚中用宏忠蓋帝嘉乃勲簡撫貴省興革利弊群牧引領滇南初闢彈壓維艱爰命總督匪公孰先崇岡峻嶺羊腸曲盤猺獞裸苗誰爲之前惟公方畧身先士卒勦頑踏凶民醇地闢瓦礫荒蕪盡菽黍稷惠澤旁流肉骨肥瘠上稽厥功兵柄崇隆去江以北巡海而東姪變赤子導和致豐非唯兩浙波及鄰封再督于閩聿顯其績履危陟艱波濤洶嚇扶病直前繪圖籌畫外海來賓

繫誰之力哀哉我公忠不顧家傷哉我公奮不顧身  
山陬海澨深林密菁巒烟毒瘴二豎交侵尚爾勞瘁  
片晷不寧公忠誓効命遂以傾衆咸謂公入贊皇極  
下釐庶工許謨密勿論道綱繆永資調燮天何難謀  
奪此良弼幸毓鳳麟克紹克繩建勛樹績弗替厥聲  
綿綿華胄咸國之禎唯公盛德歷世簪纓然予之懷  
依依終始昔年把臂我心實寫曾幾何時溘焉竟逝  
願言思公曷其有已嗚呼哀哉尚饗

康熙十一年歲次壬子春王正月戊申朔越十有五  
日壬戌江南江寧蘇松常鎮惟揚七府徐州一州承  
宣布政使司布政使慕天顏謹以剛鬣柔毛之儀致  
祭於

皇清誥封光祿大夫總督浙閩太子少保兵部尚書謚  
清獻公趙夫子大人之靈曰嗚呼公之於世五十二  
年百代一人千古一時何勲業之未竟遽棄世而長  
往耶嗚呼天胡付公以瑋奇俊杰之才而不假以期  
頤耄耄之壽胡畀公以風雲日月之任而不終其經

綸翊贊之功豈非事有人力之可致猶不可期况天  
理之冥漠又安可得而推者耶已酉之春顏待罪莆  
陽聞公訃音學古人心喪之禮遙奠再拜而哭之今  
承 天子命諭祭公於金陵之 賜塋豐碑宰樹隆  
然鬱然長弘血化於三年丁令鶴歸於雙表身還箕  
尾氣作河山玉几金鳧在 帝左右公其來享來格  
以慰

聖天子撤朝減樂之誠乎否耶昔公之歿於海濱也朝  
野遠近僚屬將佐之士莫不盡其哀公之喪輿至武

林也豪杰自命忠驅義感之輩莫不致其敬及今之  
祭葬也則又莫不以爲榮京師至秦至楚極之滇黔  
閩浙南北綿延萬餘里知與不知咸徒步持紙陌辦  
香失聲而相弔不自知其涕泗之交頤也嗚呼公之  
奇功格天特忠入地四海之人猶能道之而况清風  
之所披映惠澤之所漸被耶販夫牧豎女紅洗削猶  
當聞而肅然以敬愴焉以悲而况沐浴提携最深如  
顏者有不痛定思痛沒齒如一日者耶若夫

世祖皇帝之用公與公之受知于

今皇上仗旄秉鉞開闢蠻荒筭路籃縷撫綏窮髮不數  
韓滉之轉輸東渭而德裕之控扼西山也迨尚父加  
賜履之地魏公兼三鎮之權歷視巖疆驅馳海嶠以  
膠革爲席薦以露霧爲糗梁鞠躬盡瘁死而後已畢  
命之頃念念不忘君不讓王坦之之臨終憂國而房元  
齡之疾革抗表也彤管書之青史傳之顏於疇昔之  
歲伏泣搗管而泐之以昭告我公之几筵悠悠我思  
曷其有極所謂登泰山而莫窮其高涉黃河而莫測  
其深者非耶嗚呼公何遽棄世而長往耶尚饗

康熙八年歲次己酉季春甲午朔越祭日壬寅治原  
任陽和道副使曹溶謹以香帛蔬饌之儀致祭於  
皇清誥封光祿大夫總督浙江福建等處地方軍務兼  
理糧餉太子少保兵部尚書兼都察院右副都御史  
君翁趙老公祖之靈曰嗚呼公之名在朝端澤被  
當世士大夫稱偉績者必以公爲首夫豈吾浙之所  
得而私然浙之愛公獨切望公獨深雖兒童婦女咸  
知誦公之德而服公之慈當其筮仕秦楚起家郡邑  
早已共見其瑰奇旣而西南不靖大師克舉叅藩轉



饋飽歷艱危遂膺

天子之特眷開幕府於南維自滇黔寇亂歷有年所非公收拾餘燼招集流散曷能復爲郡縣而保有遺黎若我浙之登版籍也效順爲先而山陬海澨流離轉徙之狀大異於承平之時公之蒞茲土也首察民之疾苦恒早作而夜思心之可及者必見諸事功之已奏者弗形諸詞以恩逮下以法繩屬苞苴一無所入皎皎獨存其素絲然大慝必懲而小過常恕故律人以嚴而人安之大政大役必以身任手口拮据盡瘁

卒瘁而屬吏恬熙如故或事過而人不之知至于卒伍聚處城市喧闐公馭之有度恤之有禮悍者不敢肆而黠者不敢欺兵民各安其所將吏咸盡其職者七載於茲遂令投山竄海之衆烟消霧釋解甲而就綏蓋東南數千餘里莫不翹首企足以待公而以其身爲安危遺大投艱、新恩踵至務竟其勲業之所爲才鉅者必勞望隆者鮮暇公乃左奉簡書右提藥石而不敢屢以病辭、命使遠來巡視海上公出入與偕無險不屈而不自知其心力之疲方鋤貪擊暴

刷閩南之積弊以報 當宁之倚毘衝炎而往踰寒  
未還憂勤萃其內幾務叢其外卒邁疾不起於赤水  
之湄嗚呼痛哉余於公有夙昔之交余知公深公遇  
余厚殷勤握手而提携每謁公於戟府形神尚裕體  
質未衰退而爲浙民志喜喜公之仁被乎吾浙者將  
自此日益吾浙之藉庇于公者當百歲而無移夫何  
奪公之速遂一去而不可追始聞而疑繼而駭久而  
信然矣曷禁其橫出之涕洟山樵谷倅童悲叟泣固  
兩邦之不幸勵節者無與爲勸抒忠者無與爲式殆

舉世之所欽盡君親之大義躬文武之成憲方之於  
韓范而無愧色者非公其誰何爲遽騎箕於天上棄  
蒼生而若遺余是以攄其哀悼非徒爲平日之心期  
敬臨筵而酌酒與靈鑒之昭垂嗚呼哀哉尚饗

康熙八年歲次己酉三月甲午朔越祭日乙巳治制  
吏科都給事中今內陞嚴沆工科掌印給事中柯聳  
刑科都給事中今內陞楊雍建刑科掌印給事中查  
培繼巡視河東鹽政浙江道監察御史顧豹文內弘  
文院檢討項景襄內院纂修正六品汪肇衍邵吳遠  
原任陝西布政司商洛道叅議錢受祺原任湖廣按  
察司分巡上荆南道副使張惟赤廣西道監察御史  
嚴曾集謹以剛鬣柔毛清酌庶羞之儀致祭於  
皇清誥封光祿大夫總督浙江福建等處太子少保兵

部尚書兼都察院右副都御史加一級君翁趙老祖  
臺之靈曰嗚呼嘗讀祭法有曰法施於民曰以死勤  
事曰能禦大災能扞大患則孰有如我公者乎公之  
起家郡邑其善政章章在人不服論由監司而撫軍  
由撫軍而總督其功烈表表著巴楚滇黔間亦不暇  
論惟是我浙僻處東南壤接閩海數苦鯨鱷民不堪  
命又軍興往來供億繁多雖督撫於前者多有善法  
而成績爲難自我公來總制斯土瞻毗隸整師旅又  
移書布告咸使向化節鉞未幾凡萑苻諸不逞向之

牙旗金鉞窟穴滄溟思蹂躪我疆土者旣憚公威稜  
復服公雅量相與棄鋒鏑束戈鋌內首迴面嚮風受  
吏動以數萬計一時海波爲之不揚又民與兵比屋  
而居所在都有畸軍懼無以作氣畸民則無以使保  
妻子公爲申明軍政嘉予良牧與各有司共修舉之  
至於司寤司覈司門諸職無少假貸不恤傾餐錢以  
飲食無告民以故民與兵處若不知有兵者設法不  
足施於民則無民法不足施於滄嶼狼子虎孫芽蘖  
險阻必將動搖城邑魚肉黔首煩興軍餉則法施於

民而能禦大災能扞大患孰有如我公者乎自浙閩  
命下雖伏枕卽屏去醫藥驅馬八閩間踰越山陬據浮  
海滋審要害清藪澤而尤於濱海郡邑省勞苦偵賢  
否進父老而慰怙之海島冬春江帆來去勤勞無虛  
日方還浙而溘焉長逝以死勤事又孰有如我公者  
乎昔歲公何特恩襄事紳士庶民無不奔趨愁歎  
慮公歸不復迨旌節還吳輒欣喜過望今蒞兼兩省  
謂將移鎮三衢暨遵海而南又莫不延頸睇盼思覩  
顏色豈料我公竟長逝嗚呼公偉伐鴻勳于浙獨

懋深恩大澤于浙人獨長言聞之日紳士相與哭于  
鄉軍旅相與哭于舍擔夫豎子相與哭于途在天之  
靈其亦有鑒我者乎嗚呼聞商旅有欲爲公生祠祠  
於都門以示瞻依者兩浙紳士未嘗不快有此舉詎  
知一時拜舞之私遂爲萬年俎豆之讖乎於戲哀哉  
尚饗

康熙八年巳酉六月朔越四日世襲二等阿達哈哈  
番禮科給事中治通家侍生黃熙纘謹奠告于

皇清光祿大夫總督浙閩鄰翁趙老公祖臺之靈曰嗚  
呼哲人云徂余將安求天不憖遺俾公不留跡公忠  
孝史弗勝收若其勲德如嶽如丘儒而能帥韓范與  
儔故自始令歷佐郡服半親血戰或水或陸功成于  
撫獨運機略兩司楚憲軍民食福經營以周寔活有  
族逮黔初闢開府是役甫盈半載總制用陟兼轄滇  
南苗獍叛息農服新疇十千孔殖邊防旣靖帝念

中區遂調兩浙惟公勤劬鯨鯢授首並用三驅萬億  
此儻衣之食之凡百綢繆猶雲貴時甲辰之冬余歸  
匆匆見公于浙如舊相逢籌國籌民同契素悰自是  
往復覩化雍雍迺奉歸併錫自 楓宸謂天下患今  
日在閩孰知公功孰知公仁果領兼疆余喜若狂念  
公祝公惟公之康顧見公瘁歷泉及漳告我卒瘞示  
我繪圖冰操鏡面膽落豺狐靡利不興靡困不蘇從  
茲邊服次第無虞惟 帝相司馬在且暮公亦樂觀  
天顏以矢謨奚爲朝露終公于途昔爲葬母病今爲馳

驅亡誰非公子有淚汪汪余拂涕其如洩寔爲公而  
爲私私爲桑梓泣公爲

朝廷咨思公令子獨清白遺但如君家有范與蔡勉而  
箕裘用慰于幽九京可作或曝然以長嘯恕余誅之  
靡訖尚饗

康熙九年歲次庚戌九月乙卯朔越十日甲子原任  
浙江等處提刑按察使司按察使宋琬謹以剛鬣柔  
毛庶羞醴酒之儀致祭於

皇清誥封光祿大夫總督浙江太子太保兵部尚書兼  
都察院右副都御史謚清獻公趙老恩師老大人之  
靈曰嗚呼公之經濟社稷倚之爲重輕公之威望薄  
海視以爲安危公之生也叶昌期而名高夫北斗公  
之沒也騎箕尾而上列於東維蓋公之先憂後樂旣  
以身荷天下之任而公之精忠粹德足以當 九重



特達之知其深仁厚惠之所漸漬初被之於三江七澤其武功文教之所覃布遠而放之於鑿齒雕體金馬碧鷄之封域武溪瀘水之險巖折衝不恃夫干櫓聿修文德以懷之夜郎知朝廷之廣大南人服丞相之天威擴幅幘於萬里式增乎秦漢之前基宜滇人之愛戴浹肌髓於九黎每歲時之伏臘與武侯伏波而同祠

章皇帝憫越人之重困頻年憔悴於瘡痍畀公以全浙之節鉞資彈壓而借保釐二邦之氓各奔走於境上迓

旌幢而臥車轍者一喜而一悲蓋悲公之去者以爲棄我之何速而喜公之來者欣欣然惟恐騶馭之行遲公之涖軍也同士卒之渴飢羊開府之輕裘緩帶李臨淮之壁壘旌旗公之爲治也惡束濕而罷繭絲墨吏聞風而解綬黔黎鼓腹而恬嬉幸民安而盜息幾幾乎刑措而不施胡昊天而降割掩台耀之光輝天子聞之而震悼輟朝三日而嗟咨賜東園之秘器備典物於有司詔易名於太常無愧乎當年清獻之芳規自深山窮谷之老與夫傭保負販之兒莫不

手持瓣香若喪考妣而累歔送靈輶而過市者人人  
哭萊公之竹懷遺恩而墮淚者家家樹峴首之碑顧  
惟小子之薄劣逢豺虎而遇窮奇逞如簧之讒口織  
貝錦而哆南箕賴雲垂之與天復身名昭晰而無虧  
始謁公於幕府得親覲夫衮衣蒙齒牙之獎藉復軫  
恤其流離鞠諸懷而置諸膝衣之解而食之推古云  
感恩與知己亦何幸而爲造物所偏私昔晉史之稱  
趙衰擬之以冬日之日而鄭人之歌子產有如慈母  
之慈因公而思前哲彌信乎斯言之匪欺憶再瞻乎

色笑神慘慘而不怡召良醫於吳會與奏效於刀圭  
庸知夫兩楹之夢奠泰山頽而梁木倏爾以崩摧抱  
羊曇之深慟望西洲而透遲欲匍匐而哭總帷之次  
方將叩 魏闕而陳詞敬招魂於楚些薦明信於江  
離望龍門而不見涕承睫以交頤庶九原之降格駐  
羽節之紛披生芻在列聊以寫中腸之悱惻而所以  
重歎而累歎者爲天下蒼生而悲嗚呼哀哉尚饗

康熙八年歲次己酉三月甲午朔越四日乙酉寧波  
府知府崔維雅同知郭維新通判米霸楚鄞縣知縣  
張幼學慈谿縣知縣白加繪奉化縣知縣張奎胤定  
海縣知縣王元士象山縣知縣劉希孔等謹以剛鬣  
柔毛之奠致祭於

皇清光祿大夫總督浙江福建等處地方軍務兼理糧  
餉太子少保兵部尚書兼都察院右副都御史加一  
級趙老大人之靈日嗚呼惟靈熙朝應運日月依光  
聲騰遐邇德曜焜煌金陵發軔虎竹分防矢懸魚以

潔操敷惠政以甘棠龍由潛而始見功欲秘而彌彰  
澤膏楚甸忠感 垂裳旋晉中樞滇南清晏遠歸遐  
服文修武偃莫輦金湯章明組練 帝眷兩浙特簡  
賢哲制府凝霜彤弓麗日吏之典型邦之司直吐納  
江河包涵埏埴懷瑜握瑾豹姿龍德揆厥所自良懿  
莫匹徭稅賦征殫慮經營檄下百司力任澄清既無  
逋賦亦無暴征強無詭漏懦不輸盈肅清郵驛濬阜  
濠城凡有條議握吐掄英分絲釋縷弊剔利興恩威  
互濟允合民情揆厥所自豐烈獨成什什伍伍壁壘

孔固將士軍民咸包汪度殫誠撫順導歸皇路力滌  
紛華敦本履素兢凜四知屏絕貨賂萬井桑麻一天  
雨露揆厥所自冰持莫互 帝睠南州錫券宣猷瀾  
閩統轄經濟齊籌燕民寬慰甦及喘牛澳除匿課貴  
戚泥樓得情勿喜惟民是憂無壙不靖無遠不柔聲  
蜚邊徼頌溢海陬鯨鯢潛鬣溟渤安流揆厥所自弘  
負孰儔 內召甫屆爰巡邊界宿露衝霾涉登勿懈  
布鞞籃輿霜旄嵐蓋力振民瘼忘平身憊揆厥所自  
恤民莫逮爰至中途僕馬痛瘡哀猿夾轂嘯虎衝蘆

谿流夜吼松響朝呼竭精瘁力二豎侵膚揆厥所自  
安詰扁佗駕臨奉邑本城憩簣端體正襟星書夜檄  
案吏皇皇屬員懾懾龍蛇適會鵬鳥入室折棟豐林  
淪星南極野曠無遺丹忠汗血嗣公孝誠雲騎剪別  
鶴舞滄溟龍飛遠壘雅等素厠臯比叨侍瑟竽萬間  
托厦一枝安棲跼誦哀訃裂首慘脾誅曰嗚呼痛典  
型之凋謝兮怨音響之莫追聽春鶯之啼血兮昭嗣  
公之深悲矧受知之屬吏兮能忘哀迫而涕洟敬登  
堂而獻奠兮擷江岸之香薜有肴兮在俎有湔兮盈

卮九歌兮掩涕百拜兮陳詞盼神靈於天上兮祈歆  
格而來茲希嗣公之展誼兮仍垂施於兔絲嗚呼哀  
哉尚饗

康熙八年歲次己酉四月癸亥朔越祭日甲戌眷弟  
崔鹿鳴謹以剛鬣柔毛清酌庶饘之儀致祭於

皇清誥封光祿大夫君翁趙老親臺之靈曰嗚呼與公  
別幾何時而遽溘焉長逝耶鹿鳴與公生同里長同  
庠序仕同年譜卽祿位升沈判若霄壤自以爲立心  
持義庶幾與公同方故相見則心降相聞則色喜離  
群索居則相思而形諸飲食寤寐也矧當死別而易  
禁呼天雨泣神悸心裂耶唯公之精白事主主上  
深信而倚毘之公之惠澤及民秦楚黔滇吳越之民

胥沐浴而謳思之公之折節恭儉與人若不及四方  
賢士大夫爭誦說之至其兩簡制府也兒童婦女蠻  
獠巴蠻億萬口稱述而無異辭也今日聞公之訃吾  
不知其哭於堂哭於野哭於祠廟哭於甘棠之樹下  
幾何人也鹿鳴旣以哭友之禮哭公於位而復爲文  
以哭曰於乎我公天挺奇骨翁彙江河堅砥金石際  
運風雲豹文鵬翼山陽試宰訟堂風清潛出奇師電  
邁雷驚剪茲苞蘖商雒以寧逮丞建業左右戎行颺  
鋒却敵解網活降恩波無極滙原湯湯公兩攝郡姑

熟吳閭下車俗革山高水長王旅嘽嘽用力西南中  
樞特達啓建湘潭龙精飭伍閭里晏然爰參楚籓轉  
輸是賴譽望赫隆節鉞攸屆於爍王師昆明是征穀  
與金埒 宸慮南傾公孚誠信煦育春溫義租競勸  
士馬飽騰醜旅革面厥角咸崩師中承寵 帝命再  
膺一節萬里瘴偃波澄林林錢塘江山之阻形勝膏  
腴爰移闔府公崇古治黜澆還樸衣不重帛食不二  
肉禾黍澤增旌旗氣肅公乞祿養未遂初懷公乞終  
喪 聖意重違殷勤孺慕明發常悲 詔省開府公

兼閩疆視事唯虔趨飭園防三事靡監蒙犯霜露陟  
巘降原疾羸弗顧泰山頽峯大星隕戶我爲公惜公  
才未盡德足濟權學能敷政取彼鯨鯢王國庶定勒  
勛太常鐘彝彪炳公優爲之天何不憇我爲公慰公  
志已申請共爾位唯公之能以死勤事照格靡羸天  
監厥德 帝度其心功崇元祀焜耀九京唯公有子  
元方季方鳳毛麟趾世濟其祥天錫胤祚百世克昌  
我與公交匪伊朝夕公墳我篋公礪我砥德義相資  
意氣相倚千載長辭道阻且躋帷帳不臨手足不啓

鷄酒遙陳涕流曷紀靈其有知尚歆牲醴辭曰波渺  
渺兮東南若有人兮駕文螭邗之杰兮國是所依靈  
之徂兮風肅肅遊玉京兮享鈞曲靈之降兮聽我些  
騎箕尾兮壯山河瞻寵賚兮 帝闕聽民懷兮輿歌  
奠鬱鬯兮醪醕陳蕉荔兮嘉蔬紛來格其有象兮儼  
下上而參差執欸欸之庶誠兮其母遠而長嗟尚饗



康熙八年歲次己酉四月癸亥朔越祭日丙子屬吏  
協守建寧府副將賈繼誼建寧府知府孫裔昌同知  
陳應熊通判張念祖建寧城守中營遊擊劉國泰左  
營副將管遊擊事楊希俊左營叅將管遊擊事李國  
棟中營中軍遊擊管守備事曹維城左營中軍守備  
方逢時右營中軍守備焦瑞芝建安知縣沈鱗甌寧  
知縣章可程崇安知縣章尚忠建陽知縣馬世道浦  
城知縣趙清潤松溪知縣董良櫝政和知縣魏慶雲  
壽寧知縣李滋生等謹以剛鬣柔毛束帛庶饒之儀

致祭于

皇清大誥封大柱國光祿大夫太子少保大司馬大中丞趙老大人之靈曰惟我大憲臺篤生應上天之景星蒞政執中樞之衡要措治造下民之安全歷任多方嘉謀入告靡不感乎神聽諒以 宸衷誠 當宁之碩膚 皇猷之黼黻也總制兩浙德政殷流指不勝屈其飭官方而奠民生者一本忠誠愷惻和易近民浙之仕宦及夫薦紳先生窮簷編戶莫不塗歌巷舞口碑載道卽越在隣封俱洋洋乎盈耳也戊申夏

閩督未補百官士庶咸企而思作而慕曰安得忠誠愷惻和易近民如公者吉星照臨大有造于東南乎則上自山谷下自海壖竊有厚幸焉未幾

聖天子命下俾公總制兩省道路懽呼咸欣欣有喜色而相告曰名山顯位望公之來公平乎公平侯不邁哉先是 上差大人安輯遷黎有巡海之役公適與時會偕大人至閩卑職等聞報郊迎接見顏色正直之度挾以春溫自此追隨驛路朝夕稟謁命坐下詢無非肅官箴而利民物者略憲部之尊嚴而殷勤款洽

藹如家人父子何公之撫恤下情委曲周詳諄諄如此其至于經宿公館凡供帳陳設一切報罷卽一粟一蔬一舟一卒公皆捐囊授值未嘗過有司而問焉及抵芝郡職等希駐節溪干一發胸中所未盡公竟順流而下艤舟三十里外公之意蓋念艱難也恐滋擾也次早抵延津時值承恩伯周全斌奉 旨移營急需舟楫公檄艘千餘職等公任覓報此亦奉事之常耳公且溫文備至慰勞再三及抵省會臨海陬從前大人供應俱捐已貲上不煩官下不費民舉郡國

甚嘉悅夫師行旅從苟非有人焉竭蹶以圖善爲調劑開海之間蕭然煩費矣今閱數郡若不知有師旅也者公之功德真淡人肌膚淪人骨髓與天壤同不朽而職等國士之遇沒齒之感又當何如也意其事竣旌回必由故道職等欲再陳利弊仰候鈞裁使官民遵守勒諸貞珉垂之永久不虞軒車登陸由福返浙一腔未議未遂直陳凡我同官倍深惆悵雖然猶可異者今夏必巡歷諸郡再盡傾倒豈於三月朔日忽聞訃音不覺涕泗交頤驚慟欲絕始知我公于二

月十七日乘白鶴而入蒼雲竟赴玉樓之啓矣嗟乎  
哉古君子爲國亡身代不乏人獨公從事沿海日夕  
靡遑風餐露宿而供億之煩驛騷之苦公皆嘔盡心  
血毋累我民豈所謂蹇蹇匪躬之故者耶倘所云天  
道是耶非耶職于是集文武屬員哭公之靈于郡神  
廟瀝誠追薦若見白衣冠而赴吊者盈街市莫不奔  
走悲號聲震遐邇非公之功德浹人肌膚淪人骨髓  
疇能若是然則卽一郡之哭公而兩省之哭公槩可  
知也卽兩省之哭公而廟堂寰宇之哭公又可知已

嗟乎哉公先撫天南次督兩浙又次兼督閩公之功  
德不可殫述大約綜厥生平慈祥愷惻本于性成公  
之仁也因材器使不爲求備公之恕也軍興繁擾案  
無留牘公之敏也苞苴不行暮夜俱絕公之廉也其  
他周恤物情洞見臧否自奉之薄待人之寬種種利  
國安民之念上報

聖主下濟羣生公嘗曰余之所長不過大事化爲小事  
小事化爲無事如此而已矣嗚呼今安得此仁人長  
者之言乎職雖不獲叩公之靈執公之紼而公之勛

業在旂常利澤在四海職卽悲哀嗚咽一俯仰間猶  
能彷彿乎公之英靈鏤篆乎公之儀像嗚呼言有盡  
而意無窮屬下之訟不足以酌萬一爰遣微吏薄具  
祭筵代陳卮酒表寸念之恪誠併申奠儀冀濯靈之  
來格嗚呼尚饗

康熙十年歲次辛亥季冬下浣越十有六日沐恩門  
下副叅遊都守胡茂盛張龍劉澤深高祿王文魁張  
大昇馬金龍梅魁趙夢軫陳弘道楊萬芳張一壯張  
柄曹大偉王國棟耿星辰鍾漢玉金滿斗宿陞周元  
功譚如絲黃毓秀田有芝韓瑞麟李逢春遲太名周  
士緯吳進才安耀張守恩邊有時張通金滿玉李國  
林宋貞常起鳳呂奎昌孫惟法呂顯昌曹象恒朱萬  
寶趙萬連張文福李師孔黃中憲宋邦傑朱知微衛  
聖疇許祿秦國任楊遇春蔣明棐騰龍薛受益向龍

沈澤張元勳等謹以牲帛庶饑之儀致奠于大國柱  
宮保部院恩主趙大老爺之靈曰嗚呼古今名世之  
佐功勳著於緇帙者代不乏人而至所稱社稷輔則  
獨少概見若恩主趙大老爺以將相之姿握文武之  
略生爲社稷之彥後爲社稷之神 朝野崇祀之士  
民歌思之而茂等尤沐恩施淪于肺腑則不獨興梁  
木之悲動西州之泣也已蓋公應運而出歷任關陝  
江南晉階楚憲其循卓之猷爲諸司最茂等追隨下  
塵披堅執銳櫛沐風雨以勤勞 王事者自楚入黔

滇始黔滇古徼外之地最稱難化自

聖朝創祚以來海宇皆傳檄而定而獨蠻獠僞屬負固  
盤踞是時大兵南下六師雲集 貝勒王公侯以及  
經略諸部堂莫不統重兵以撻伐之相持數載不能  
下當事環顧無策 經略洪公知公具異才延之帷  
幄公卽指陳方略調設機宜竟以其謀一鼓而黔地  
蕩平

天子嘉悅其能 特錫璽書撫循其衆公聞之單騎蒞  
軍門勦撫兼施安攘並濟招徠流移禁戢士卒反側

子賴以安以致芻餉營壘種種艱繁公皆親爲經畫  
咄嗟立辦王師得以奮勇爭勝無左顧之憂者寔  
公一身繕治之力然黔滇接壤其間不逞之徒尚猶  
豫觀望者以滇地未闢公復相其山川塞阨敵人情  
形與諸當事密陳之不半載而滇地悉入版圖緬甸  
交趾之區盡皆削平一時露布飛馳公勲爲諸將帥  
冠于是 鳳綽寵異遂以總制兩省莫不快心悅豫  
蓋此一役也公氣量豁達軍令整肅與士卒同甘苦  
共衣食開誠布信無纖芥疑忌以致人人畏懷莫不

願效死力以上報公德而茂等久執鞭弭尤深教育  
投醪挾纊醉心感泣故所嚮有功人無匿志類如此  
然公所最難者黔滇形勢險阻溪洞邃密叢菁雜棘  
之境足跡所未到層瀾疊嶂之處車塵所未至蠻烟  
瘴厲地界不毛畏誅則潛匿伺間則披猖出沒不常  
飄忽無定卽昔武侯張輔之賢督師南征旋服旋叛  
必屢竭威力而始克靖今公督撫其間敵人聞其威  
名率皆悍服雕題漆齒綠睛赤髮之徒亦皆延頸扞  
誠投戈嚮化其治績之神尤爲古今所獨著當是時

車書一統玉帛萬區德懋懋賢功懋懋賞中外僚案  
莫不倚公先聲以爲屏翰獨江浙一帶海島餘孽數  
蠢蠢欲動鯨波射日鯢浪翻雲當事計餉籌兵羽檄  
交馳動經歲月靡有成效議者謂莫安肆靖必得股  
肱心膂才德兼優之佐以統馭之始足以克敵而奏  
敷功于是僉謀枚舉非公不可

帝曰俞晉秩宮保溫文寵錫俾公專制浙服以建奇勳  
公因復星馳蒞任茂等亦得效力東旋公至卽曰東  
南民力竭矣去一切繁苛之務而獨持大剛不寬不

猛與四民乂安凡潢池跳梁萑苻竊發者公惟開諭  
曉布示效順伏莽削平而濡淶島嶼之庶畏公之  
威示公之義梯航欵塞叩壁叩轅東方竟以底定告  
厥成功至于讞巨獄平反株連者以千萬計剔利弊  
蘇解積困者以數十事其德之入人之深不啻如饑  
渴飲食之已暨公總轄閩浙向之遷徙散亡不下數  
萬戶公奉

聖天子弘仁相其地界安集慰勉自清漳以及台寧沿  
海數千里公躬行揣度披荆棘冒霜露盤嶺叢谷寒



津絕澗之地車不得馳輿不得行公不憚劬勞旌節靡不遍結之以仁勸之以義諸流亡感悅僉曰非公不能生我迄今禱祀弗諉云自是公之德雖昭而公之體已瘁數十年來公無刻不以忠盡自矢竟以積勞成疾至寧之馬家畧遂仙遊考終正命時猶諄諄以國計未寧爲念一語不及家事古稱鞠躬盡瘁身騎箕尾氣作山河公之謂矣公素性淡泊雅尚大節生平尤好推賢納士延攬恐後以故循吏儒將出公門下者甚衆如茂等洩洩之姿亦辱收之藥籠錫

以譽言寵以任使銘佩之私勒之韋絃自公逝而茂等益失怙恃隕泣無從追慕悲愴弗能自慰因與湖僧謀搆一椽鑄金設像冀得昕夕禋祀如覲公神以酬恩知而浙之名紳賢士及四方遊覽瞻禮者咸各欣喜亦慷慨佐助以襄盛舉蓋公之勲洽于一代而不自居公之德歷于宿世而不自有海內蒼黎仰之如神明戴之若父母勒功銅柱紀績凌烟自與日星社稷並傳不朽固不獨彤弓以錫之鬯卣以旌之又何待茂等芻蕘之言追序其美乎然茂等親受恩知

沐浴最深生成罔極歷久益彰不得不以禪言巴詠  
以誌公社稷之勲于萬一茲者窳窳卜吉茂等執紼  
未遑惟椒馨之是獻侑几筵之具歆則庶幾假哀慕  
之言以覩公陟降之儀則豈徒與峴山之碑同其涕  
零甘棠之樹偕其謳吟也尚饗

康熙八年歲次己酉五月癸巳朔越祭日甲辰温州

府知府楊士烜同知張經通判李景白永嘉縣知縣

陳聖俞平陽縣知縣呂鳳強樂清縣知縣竇三聘泰

順縣知縣張若梧署瑞安縣縣丞厲貞原任平陽縣

知縣陳弘周等謹以剛鬣柔毛粢盛醴齊之儀致祭

于

皇清總督浙閩等處地方軍務兼理糧餉太子少保兵  
部尚書兼都察院右副都御史加一級君翁趙老大  
人尊靈前詞曰嗚呼自古 國家用人得才智者非

難而得賢良者爲難得賢良者爲難而得賢良之盡  
忠爲國者爲尤難揆諸今日求其信義自昭仁廉  
並著所稱盡忠而勞于王事鞠躬盡瘁死而後已者  
惟君翁趙老大人足以當之適值大人訃音遙聞而  
南中人民哀痛如喪考妣卽深山窮谷無不悲涕號  
泣甌之文武暨某等僚屬未有不痛哭而流涕者追  
憶我大人三韓巨族錢嶺雄才學宗孔孟德並伊周  
初授西秦邑侯復遷金陵司馬轉移三楚監司超陞  
古滇撫憲旋擢雲黔總制自北而南由西至東所過

之處口碑載道卽古之良相如董賈房杜姚宋趙張  
韓范諸呂之輩無以加焉後因吳越重地海寇震驚  
遂蒙特簡總督全浙蒞任以來海上遊魂聞風向  
化而大人之清廉忠直爲清朝第一我大人之蒞  
政也籌邊度餉夜以繼日爲國焦思坐以待旦席  
不暇煖手不釋卷不賞而勸不怒而威至今士民得  
安享清平之福者孰非大人之力也某于甲辰蒞任  
東甌詣省叩謁一見如故迨至乙巳巡歷孤嶼案查  
五邑積逋至四十餘萬當蒙題請蠲豁至今萬民

免鞭箠之苦者孰非大人之力也今正奉 命會同  
上差大人巡歷海島雞犬不擾耕鑿自適士民得閭閻  
安枕者孰非大人之力也今又奉 命兼督八閩閩  
之黎庶及賢士大夫無不仰望若大旱之望雲霓者  
詎意我大人竟棄人間事而羽化登仙乎嗚呼痛哉  
昔五殺大夫死秦國男女流涕童子不歌謠春者不  
相杵寇萊公卒枯竹生笋韓魏公歿大星殞地司馬  
溫公卒京師士民爲之罷市忠介海公歿喪出江干  
兩淚動天至我大人仙逝之日百姓號泣閉門罷市

白衣楮素哭不絕聲當與前賢媲美若非仁德兼全  
者曷克臻此當日宋文信公卒歸葬吉州母柩同至  
人以爲忠孝所感而我大人臨終之時兩令嗣自黔  
而歸父子相逢然後永訣豈非感動天心天之所以  
報善人也哉嗚呼位如我大人者位已尊矣德如我  
大人者德已盛矣人方望其久于人世爲浙閩之柱  
石夫何昊天不吊遽令我大人云亡也耶嗚呼痛哉  
大人自少至壯由縣及今愛民如子廉潔自持有周  
石孔子孟之風名震 朝野德垂青史一旦勞于王事

卒于旅邸遂荷

皇上隆恩特賜優卹且有令嗣克紹箕裘大人亦可含笑九泉矣雖然某等該忝屬員情同父子沐恩最深脚結未報特具蘋藻之奠用伸繆戀之私神其不昧來格來歆嗚呼哀哉伏惟尚饗

康熙十年歲次辛亥秋七月庚戌朔越祭日庚午原任雲南尋甸府知府李朝柱謹以剛鬣柔毛粢盛清酏之儀致祭於

皇清特進光祿大夫上柱國總制浙閩宮保大司馬大

中丞謚清獻君鄰趙老大人先生之靈曰惟公生有

功于社稷死足光于史冊天下紳士人民無論治

與未治識與不識莫不欲親見其顏色躬被其德化

卽下至愚婦稚子苟知樂生惡死趨利避害居安思

逸者皆欲得公之撫綏而嘉惠之其引領之望切若

雲霓蓋非紳士人民愚婦稚子之獨有私于公也公自筮仕令尹以至身膺節鉞無時無事不以利濟生民奠安社稷爲己任於戲公之精誠公之仁愛卽公之德業勲名也方公督滇黔時負固之萑苻未靖旁午之羽檄交馳苗民雜處戰守未備百廢待興一旦禍亂轉變于俄頃使非公以通方肆應之才鎮靜其漂搖風雨之勢則滇黔之民尚有孑遺乎大抵公之于民也嘗不恤一身之性命死生保護出水火以安于衽席之上而民不知者多端矣某以一介疎

庸一見受知破格優渥越于稠等及其濫膺守牧公再以大中丞總制浙閩夫浙閩福員負山瀕海民苦兵革不得休息二十餘年矣公始下車卽修理封疆整飭士馬剔釐蠹弊以謹烽埃以詰奸宄以廣教化凡養士治民者惟以開誠布公興利除害爲兢兢披其入告諸疏無非廟堂至計生民隱憂有爲民請命而不卽得者不憚至再至三其因時制宜良法美意足以播金石而垂永久者諸如嚴株連以絕供扳民得以全性命而保身家者不啻萬井禁樵牧

以肅軍紀民得以守田禾而養桑柘者遍于兩省給  
供應以待大兵民得以減夫役而免搜括者清于驛  
路吁公之精力爲民而竭公之骨髓爲民而枯不避  
風雨寒暑惟知以身愛民面目爲之黧黑而不知以  
身救民手足爲之胼胝而不覺勞瘁所至寢疾以薨  
其時萬姓哀痛有如失怙恃卽遠在滇黔之民間公  
訃音無不追思其舊德而老幼爲之巷哭使天愛斯  
民假公以衛武之年進而論思啓沃調和鼎鼐以大  
竟其設施則霖雨遍天下而伊呂周召之業可計日

而待矣豈特令士民如吊叔子而僅墮峴山之淚也  
乎以故 朝宇之上重公勲業者績定謚崇褒清獻  
三 賜諭祭以從來未有之 隆恩特優盡瘁之元  
老也凡公之爲此豈有意曰我如是以爲臣

君必有以報之

天地祖宗必有以報之哉乃邁德挺生賢豪輩出如嗣  
君伯仲者莫不涓涓杜葉敷周道之清陰韡韡棠花  
曜虞時之彩色也行將寵膺民社補袞山龍以紹厥  
前徽易易耳某以鞅掌簿書羈守于雲山萬里之外

誓捐頂踵未遂趨承嗚呼泰山其頽空歌伐木之詩  
昊天不弔竟負彈冠之想公誠往矣讀公之諫草遺  
書則公爲國憂民之心如在觀公之車器劍佩裘  
馬服御則公之儀型無不在適公之所履山川城郭  
壁壘墩堠則公之疆理崇勛又無不在及觀黎民之  
家尸戶祝歲時祀禱君蒿悽愴如或覓之過蒹葭白  
露之鄉聽樵山牧豎之歌呼嗚嗚則公之靈爽更無  
在而無不在是公雖往而公之精誠足以貫古今而  
昭日月者不與俱往也而抑又何悲乎公之仙遊與  
歸化嗚呼華堂撤樂青原起宅雲翼升車姻親執紼  
蕭蕭白揚晞晞薤露追惟我公哀如何矣敬採谿毛  
虔茲悃悫英靈來格伏惟尚饗



康熙八年歲在己酉十月辛酉朔越祭日辛未

欽差安南副使正一品服兵部職方司主事舊治屬受

業楊兆傑謹以剛鬣柔毛香楮清酌之儀致祭於

皇清誥封光祿大夫總督浙江福建等處地方軍務兼  
理糧餉太子少保兵部尚書兼都察院右副都御史  
加一級謚清獻公君翁趙老夫子老大人之靈曰嗚  
呼古名公卿之死王事與天下事者不必皆恃氣節  
爲之也天地當剝六之運國家際叔季之秋士君子  
出而任天下肩弘担巨一旦事不可爲而以身命殉

聖賢之所取而聖賢之所不得已也若夫生昌盛之時遭逢

聖主殊恩累代不次之簡拔不世之知遇而授以最難處之功名最難任之封疆極半生拮据卒瘞山川險阻所不辭暑雨寒燠所不避甚至家室起處飲食衣服所不猶而卒以其身矢之勞苦艱悴之地而莫之悔此非氣節爲之而醇德爲之也是則唯我夫子足以當之夫子秉性孝友負質清醇大槩爲篤行君子其仕績由郡佐而監司而中丞而總制如范仲淹之

知軍事鄮侯之轉餉裴晉公之節度李晟之經略後先項臂 本朝實錄載之名大臣傳紀之滇黔吳楚兩浙八閩之人能言之小子喋喋毋乃阿所好顧吾之所以哭吾夫子者實有根於腑膈而發於性情者記予弱冠時以諸生受夫子知撫摩愛惜有猶子誼後半路一官踉蹌于黑風羅鬼之鄉夫子乳之哺之教之誨之左提右挈瓦全之而玉成之俾得脫坎險以有今日冷曹邸署時解清風橐以給粥餽雖河山數千里時時如親定省也客夏謬承遠役犇馳天外

間濶者十閱月今季春之十八日入關接邸報乃知  
夫子以勘海勤癯車橈道途捐館于四明之郊比時  
哽咽刺心以不得永訣受辭抱憾終天也茲幸曩修  
不竭夙因有種舟次石城獲撫棺一哭稍慰鄙忱然  
而羈縻韉鎖築塲之久終難自效則亦大咎乃心矣  
稽昔司馬溫公卒國都皆罷市邊羌部落咸感泣失  
聲聞夫子易篋後諸省直紳士黔赤悲哀一復如是  
是則涕泗者固不止某輩受恩弟子也況

天恩隆沃崇褒謚厚卹蔭諸世兄之爲祖謙爲夷簡相  
門之相自不足異而在天之靈赫濯震厲夫固掌雷  
霆風雨于東皇北溟間也又何事沾沾掩袖爲尚饗

起麟唐四懸詔王有成等率衆

劉尚仁馮國富等謹以清酌庶饗之儀致奠于

處也方軍務兼理檄餉大

處也

處也

處也

處也

處也

稽昔司馬溫公卒國都皆罷市邊羌部落咸感泣失  
聲聞夫子易箆後諸省直紳士黔亦悲哀一復如是  
囊風雨于東皇北冥間世及何事古古斃斷爲尚鑒  
門之休自不異而吾天之靈赫爾靈亂夫固掌雷

康熙八年歲次己酉仲春甲子朔越二十有七日庚  
寅駐防杭州正藍旗漢軍固山下撥什庫孫起爵姜  
起麟唐四懸詔王有成等率衆披甲修三林自黃七  
劉尚仁馮國富等謹以清酌庶饘之儀致奠于

皇清光祿大夫總督浙閩等處地方軍務兼理糧餉太

子少保兵部尚書兼都察院右副都御史加一級趙  
大老爺之靈曰 國家設立文武兩途文以致治武  
以勘亂而以疆土甫闢天下甫創時則武事爲尤重  
自非才德兼隆恩威並著者雖能得三軍之身而不

能得三軍之力雖能得三軍之力而不能得三軍之心雖能得三軍之心而不能使我三軍之室家感念寤寐懷思也惟我趙大老爺之總督兩浙也其惠澤無所不至我主帥體朝廷之心以爲心而趙大老爺亦爲我三軍恤其饑寒憫其勞苦時其簡閱厚其賞賚由是士飽馬騰器械精良甲兵犀利人人有敵愾之心東海鯨鯢直欲舉而吞之以三軍之合力而報我主帥以主帥之報而報我趙大老爺因以答朝廷平日豢養之恩此我旗下軍士之素志也而何意

兩省之 寵命方來海上之巡行繼起自閩至浙界外之榛莽瘴厲又值積雪沒脛堅冰在鬚之時內撫百姓外籌軍旅千頭萬緒應接不暇冬春之交車馬無頃刻之停至于力竭心勞而溘焉長逝嗚呼痛哉省中聞訃不特諸大夫文武哀而縉紳先生無不哀不特縉紳先生哀而市井閭巷以至遐鄉僻壤深山窮谷之細民亦無不哀迨夫我等軍士心粗志豪胆壯氣烈尤不易動其哀思而亦爲之負戟而長嘆荷戈而隕涕也則無不哀可知已昔人鬻衣以致奠巷

哭以過車喪出江上白衣冠揭楮帛而送者如哭私  
親然未聞有武夫壯士爲之哀號而涕泣者也我趙  
大老爺之德真有與閩山俱高與浙水俱深者已憶  
昔二月初旬日月方燠而霖雨連綿晝夜不止意以  
爲春水之常而抑知大星隕墜天亦爲之悽愴而欲  
絕也哉嗚呼分有尊卑心無上下旗下諸軍不約而  
同敢以薄奠聊作壺漿嗚呼尚饗

康熙八年歲次己酉季夏望後十有四日浙江嚴州  
府建德縣知縣項一經謹以牲帛醴齊粢盛庶品之  
儀致祭於

皇清光祿大夫總督浙閩等處地方軍務兼理糧餉太  
子少保兵部尚書兼都察院右副都御史加一級君  
翁趙老大人老夫子之靈曰嗚呼聚散離合之故豈  
不以天哉經爲先生丁酉楚闈所得士知遇非常蓋  
爲天下得人誠不殊子弟視之矣先生自是總制浙  
閩距楚三千里親炙雖疎而天地生成之心時時想

見之丁未經謁選授李金華得見先生顏色塵教諄  
藹足快生平爾時以李官奉裁歸楚師弟相望邈若  
河山然三秋雖隔從遊尚自有日茲獲補令建陽舟  
車載途方幸得復見先生顏色塵教諄藹真足大快  
生平矣詎意几杖徒勞夢想而泰山梁木倏爾云亡  
也哉嗚呼旦暮之遇竟成幽明永隔矣日月照臨父  
母孔邇今安在耶涕泗無從能禁其飲河遡源之痛  
哉然而知己之恩上同生我徒撫棺爲哭亦烏足以  
畢其衷懷也耶築室獨居上慙端木磨鏡束芻復愧

孺子仰天泣血將何以酬深恩答生成也耶唯是公  
能知我我能報公蓋哭有盡而哭之心無窮亦猶報  
有盡而圖報之心無窮也乃辦香卮酒哀號悲獻遂  
不計其言不成文而哭不成聲矣詞曰惟公韵字玉  
粹金瑩惟公德量嶽峙淵渟惟公經濟普相忤卿惟  
公惠愛緯武經文楚歌慈母越戴歲星詩書啓後得  
路青雲卽今鳳雛苞彩繽紛澤流斯世功勒鼎銘無  
何一旦忽焉返真嗚呼傳騎箕尾之隕大星人喪元  
氣世失國珍公能知萬鍾之于我何有而等伊周之

勲業如浮雲哲人知化君子達生唯公自有其達生  
而何遜乎王喬何戀乎阿衡生芻一束如玉其人亦  
聊以誌無可問之忱吾將安仰如慟心乎夢奠于兩  
楹嗚呼尚饗





